



Ekspedisi bermotor Watikah Kemerdekaan London-KL bermula

Oleh Mohd Nasaruddin Parzi - Jun 6, 2023 @ 1:06pm
bhnews@bh.com.my

KUALA LUMPUR: Enam rakyat Malaysia akan memulakan ekspedisi bermotosikal dari London ke Kuala Lumpur bagi menyempurnakan misi Ekspedisi Perpaduan Watikah Kemerdekaan 66: London-Kuala Lumpur 2023 (EPWK66-2023) bermula 20 Jun ini.

Ekspedisi itu akan mengambil masa 66 hari, merentasi 66 bandar di 18 negara dilaksana bagi mengimbas kenangan pada 1957 apabila Bapa Kemerdekaan, Tunku Abdul Rahman Putra Al-Haj membawa watikah pengisytiharan kemerdekaan Malaya dari London.

EPWK66-2023 yang akan menempuh perjalanan hampir 22,000 kilometer itu, dijangka tiba di ibu negara pada 31 Ogos depan dan seterusnya menyertai perarakan Hari Kemerdekaan ke-66 tahun ini.

Acara simbolik pelepasan ekspedisi itu disempurnakan oleh Timbalan Perdana Menteri, Datuk Seri Dr Ahmad Zahid Hamidi, di pekarangan bangunan Parlimen hari ini.

Seorang daripada peserta ekspedisi ialah Eksekutif Foto The New Straits Times Press (M) Berhad (NSTP), Effendy Rashid.

Penganjur, Global Bike Explorer Sdn Bhd (GBESB) dan Malaysia Sports Media Assosiation (MASMA), dalam kenyataan yakin EPWK66-2023 akan menunjukkan kepada dunia jati diri rakyat Malaysia dalam mengharungi cabaran dan rintangan dalam dunia yang kian mencabar.

"Diharapkan menerusi Kempen EPWK66-2023 yang digalas ini juga akan mempromosikan Malaysia sebagai destinasi pelancongan pilihan.

"Ia mampu dipaparkan menerusi semangat dan konsep Perpaduan Malaysia dengan menerapkan nilai yang membawa maksud 'warganegara Malaysia' berbilang bangsa hidup dan harmoni, seia sekata, bersatu padu dan kasih sayang kepada negara serta masyarakat dunia.

"Semoga EPWK66-2023 mencapai objektif menjelang tarikh keramat 31 Ogos 2023. Harapan ahli ekspedisi semoga rakyat Malaysia mendoakan kejayaan kami sehingga ke garis penamat," katanya.

Sebanyak 5,000 cenderahati berupa pemegang kunci bendera dan ikon bangunan negeri di Malaysia akan dibawa peserta ekspedisi untuk diberi kepada orang ramai disetiap persinggahan sebagai salah satu cara mempromosikan hari Kemerdekaan Malaysia ke-66.